

ԵՐՈՒԱՆԴՈՒՆԻՆԵՐԻ ԵՒ ԲԱԳՐԱՏՈՒՆԻՆԵՐԻ ԾԱԳՄԱՆ ՀԱՐՑԻ ՇՈՒՐՁ

ՍԱՐՑ ՍԱՐՈՑԵԱՆ

Հայաստանի հին շրջանի պատմութեան կարեւոր հարցերից է Երուանդունիների արքայական եւ Բագրատունեաց նախարարական տոհմերի ծագումնաբանութիւնը: Ճիշդ է, այդ հարցով զբաղուել են բաւականին թիւով գիտնականներ, սակայն հարցի լուծումը մնացել է բաց կամ թերի: Այս երկու տոհմերի ծագման վերաբերեալ մեր կողմից այս յօդուածում մէկ միասնական անդրադարձը որոշակի աշխատանքի արդիւնք է եւ որոշակի նպատակ է հետապնդում, որը պարզ կը դառնայ ստորեւ:

Երուանդունիների ծագման վերաբերեալ աղբիւրների տեղեկութիւնները բաժանուում են երեք խմբի՝ ա) տեղեկութիւններ բնիկ տեղական (հայկական) ծագման վերաբերեալ (Մովսէս Խորենացի), բ) տեղեկութիւններ Աքեմենեան տոհմից կամ Աքեմենեան Դարեհ Ա. արքայի (մ.թ.ա. 522-486) զինակից Հիւդարնէսից ծագելու վերաբերեալ (Անտիոքոս Ա. Կոմմագենացու (մ.թ.ա. 69-34) արձանագրութիւնները եւ յունա-հռոմէական գրաւոր աղբիւրները) եւ գ) տեղեկութիւններ Երուանդունիների բակտրիական ծագման վերաբերեալ (Պերգամոնչի Բորիաշիք կոչուած վալրում գլտնուած արձանագրութիւնը): Մասնագիտական գրականութեան մէջ աղբիւրների այս տեղեկութիւններն էլ հիմք են ընդունուել եւ ուսումնասիրողների կողմից օգտագործուել՝ առաջնայնութիւնը տալով խմբերից մէկի կամ միւսի տեղեկութիւններին:

Բագրատունիների ծագման վերաբերեալ աղբիւրների տեղեկութիւնները բաժանուում են երկու խմբի՝ ա) տեղեկութիւններ բնիկ, տեղական (հայկական) ծագման վերաբերեալ (Սեբէոսին կից Անանուն եւ Խորենացի), բ) տեղեկութիւններ հրէական ծագման վերաբերեալ (Խորենացի եւ մէկ տասնեակից աւելի հայոց այլ մատենագիրներ, ինչպէս նաեւ միջանի վրաց մատենագիրներ եւ մ.թ. ժ. դարի բիւզանդացի պատմիչ Կոստանդին Միրանածին): Ի տարբերութիւն աղբիւրների կողմից մեզ ընձեռած այս երկու խմբերի, մասնագիտական գրականութեան մէջ Բագրատունեաց տոհմին տրուել են նաեւ այլ ծագումներ՝ իրանական, մաննայական, ուրարտական, եւ լն. :

Երուանդունիների ծագման հարցի լաւատեղեակ ուսումնասիրողներից մէկը՝ Ժասմենա Էլչիբեկեանը, բաւականին համոզիչ կերպով ցոյց է տուել, որ աղբիւրների տարբեր տեղեկութիւնները Երուանդունիների ծագման վերաբերեալ, իրականում չեն հակադրուում: Ըստ նրա՝ Խորենացու մօտ Երուանդ Սակաւակեացից սկիզբ առած դինաստիան շարունակել է իշխել Հայաստանում մինչեւ Երուանդ (Օրոնտաս) վերջինը, որից լետոյ Հայաստանը բաժանւեց Սելեւկեան արքայ Անտիոքոս Գ. Մեծի (մ.թ.ա. 223-187) ստրատեգոսներ Արտաշէսի եւ Զարեհի միջեւ: Այդ դինաստիայի ներկայացուցիչներից մէկը՝ Արտասուրայի որդի Արուանդէս (Երուանդ-Օրոնտաս) սատրապը ամուսնացել էր Աքեմենեան Արտաքսերքսէս Մնեմոն արքայի (մ.թ.ա. 404-358) դստեր՝ Ռոդոգունէի հետ: Իսկ Արտաքսերքսէս Մնեմոնը ամուսնացած էր Գարեհ Ա.ի զինակից Հիւդարնէսի տոհմից Հիւդարնէս Գ.ի դստեր՝ Ստատէիրայի հետ, եւ այդ իսկ պատճառով՝ Ռոդոգունէի միջնորդութեամբ, որը Հիւդարնէսի թոռն էր եւ Արտաքսերքսէսի աղջիկը, Երուանդունիներին օտար աղբիւրներում տրուել է Աքեմենեան կամ Հիւդարնեան ծագում:

Ինչ վերաբերում է Երուանդունիների բակտրիական ծագմանը, ապա այն մեզ է հասել Պերգամոնի Բորիաշիք կոչուած վայրում գտնուած արձանագրութիւնից, որտեղ Արտասուրայի որդի Օրոնտաս սատրապը անուանուած է բակտրիացի: Մենք միայն այս հարցում համաձայն չենք էլչիբեկեանի հետ, քանի որ նա Օրոնտասի բակտրիական ծագումը թիւրիմացութեան արդիւնք է համարում: Էլչիբեկեանը նկատում է, որ Բակտրիա քաղաքը եւ Բակտրիանա երկիրը յայտնի են եղել նաեւ Զարիասպա անունով: Եւ քանի որ Հայաստանի հարաւում յայտնի Զարասպ լեռը աղերսակցում է Զարիասպային, իսկ մ.թ. Ա. դարի հռոմէացի հեղինակ Պլինիոս Աւագի լիշատակած Արոանդէս (Aroandes) ցեղը բնակուել է Զարիասպա լեռան մօտ, էլչիբեկեանին հիմք են տուել ենթադրելու, թէ «Բակտրիան» թիւրիմացութեան արդիւնք է՝ առաջացած աշխարհագրական նման տեղանկունների նոյնացման հողի վրայ՝ Զարիասպ (Բակտրիա)-Զարասպ:

Մեր կարծիքով էլչիբեկեանը շատ մօտ է եղել իրական բացատրութեանը, սակայն, քանի որ նա միայն նմանութեան արդիւնք է ենթադրել «բակտրիական ծագումը», ապա ստիպուած է եղել սահմանափակուել՝ այն թիւրիմացութեան արդիւնք համարելով: Մեր կարծիքով այստեղ գործ ունենք ոչ թէ նմանութեան հետ, այլ՝ նոյնութեան, քանի որ Խորենացու վկայութեամբ, բակտրիացիները նոյն մարերն են՝ «գոր աստ ուրեմն Զրադաշտ մոգ,

արքայ Բակտրիացուց, որ է Մեդաց...⁵։ Նոյն գլխում Խորենացին, օգտուելով մ.թ. Ե. դարի լոյն պատմագիր Ոլիմպիոդորոսից, գրում է. «նորին դարձեալ եւ առ եզերը սահմանացն Բակտրիացուց ասէին բնակել, (նկատի ունի Քսիսութրոսի - Նոյի - որդի Սեմին -Ս. Ս.), սակաւ աւուրս, մնացեալ եւ մի ոմն յորդուց նորա անդ։ Քանզի կողմանք արեւելից Ջրուան զՍեմ կոչեն, եւ Ջարուանդ զգաւառն անուանեալ ասեն մինչեւ ցայժմ»⁶։

Որ այս բակտրիացիները հայկական լեռնաշխարհի մօտ են ընկնուել երեւում է Խորենացու միջնորդութեամբ Ոլիմպիոդորոսից բերուած այս հատուածից, քանզի վերջինս՝ խօսելով Սիմ լեռան, Տարօն աշխարհի, Սեմի որդի Տարբանի մասին, այնուհետեւ մեր մէջբերած հատուածն է տալիս։ Մեր կարծիքով Միջին Ասիայի Բակտրիա երկրի եւ նրա Ջարիասպա անունները իսկապէս կապուած են Հայկական Լեռնաշխարհի հարաւում գտնուող Ջարասպ լեռան եւ Խորենացու լիշած Բակտրիա երկրի հետ։ Ամենայն հաւանականութեամբ սա հետեւանք է տուեալ վայրում ընկնուող ցեղերի մի վայրից միւսը տեղաշարժման, որի հետեւանքով իրենց հետ տարել են նաեւ այն «արբազան» անունները, որոնցով առաջնորդուել են իրենց կեանքում։ Նոյն հաւանականութեամբ, աղբիւրներում զրադաշտական կրօնի հիմնադիր Ջրադաշտի ծննդավայրի տարբերութիւնը նոյնպէս այդպիսի տեղաշարժի հետեւանք է։

Արդեօ՞ք Բակտրիա երկիրը գտնուել է հայկական Ջարասպ լեռան շրջակայքում։ Այս հարցի պատասխանը տալու համար անհրաժեշտ ենք համարում անդրադառնալ մէկ այլ տոհմի՝ Բագրատունիների ծագմանը։ Աղբիւրների բացարձակ մեծամասնութեան կողմից Բագրատունեաց նախարարական տոհմին տրուած հրէական ծագումը Բագրատունեաց տոհմանունների, անձնանունների եւ տեղանունների պատճառով ուսուցմնասիրողների բացարձակ մեծամասնութեան կողմից մերժուել է։ Բագրատունեաց տոհմի հայկական ծագման մասին Խորենացին ընդամէնը ակնարկում է. հետեւաբար, միակ լիարժէք աղբիւրը Սեբէոսի Պատմութեանը կիցը Անանուն հեղինակի տեղեկութիւններն են.

Յայնժամ տիրեաց Շամիրամ ի վերայ երկրին Հայաստանեայց, եւ յայնմհետէ Ասորեստանեայց թագաւորքն տիրեցին մինչեւ ցմեռանն ին Սենեքարիմայ. ապա ապստամբեցին յԱսորուց թագաւորացն ծառայութենէ։

Եւ տիրէ ի վերայ նոցա Ջարեհ որդի որդուց Արամենակայ, այր գաւօրաւորի եւ կորովի աղեղամբ. ապա Արմոգ. ապա Սարհանգ. ապա Շաւաշ. ապա Փառանաւագ։

Սա ծնաւ զԲագամ եւ զԲագարատ. եւ Բագարատ ծնաւ զԲիւրատ, եւ Բիւրատ ծնաւ զԱսպատ: Եւ որդիքն Բագարատայ ժառանգեցին զժառանգութիւնս իւրեանց ի կողմանս արեւմտից, այս ինքն է Անգեղ տուն. վասն զի կոչեցաւ Բագարատ եւ Անգեղ, զոր ի ժամանակին յայնմիկ ազգ բարբարոսացն աստուած կոչեցին:

Այս փառնաւազ հնազանդեալ Նաբուգոդոնոսորայ արքայի ի Բաբելոն: Եւ ապա յայնմհետէ Բաբելոնացոց եւ Մարաց թագաւորքն տիրեցին մինչեւ ցԱղեքսանդր Մակեդոնացի, որ զամենայն տիեզերս հնազանդեցոյց ի ծառայութիւն:

Անանունի բերուած հատուածը, մեր կարծիքով, կառուցուածքային թերութիւն ունի: Շարադրուած տեքստից պէտք է տարանջատել Բագրատունիներին վերաբերող ամբողջ հատուածը, այսինքն՝ «Սա ծնաւ զԲագարատ ...»-ից մինչեւ «... աստուած կոչեցին», քանի որ այն, ինչպէս պարզորոշ երեւում է, անունների թուարկման այլ ձեւ ունի՝ սկզբնական «ապա»-ին փոխարինում է «սա ծնաւ»-ը:

Ինչպէս գիտենք, Անանունի սկզբնաղբիւր Մարբա Մծուրնացին Խորենացու կարեւոր սկզբնաղբիւրներից մէկն է՝ Մար Աբաս կատինան : Խորենացու եւ Անանունի երկերի լաւագույն ուսումնասիրողներից մէկը՝ Մանուկ Աբեղեանը, ցոյց է տուել, որ Խորենացու առաջին գրքի իբ. գլխում գոյութիւն ունի որոշակի անհամապատասխանութիւն: Խորենացին նշում է, որ լիչելու է մի քանի անուններ, սակայն լիչում է միայն Հրաչեային, որի ժամանակ հրեայ Շամբաթից առաջ եկաւ Բագրատունեաց տոհմը: Աբեղեանի դիպուկ սրբագրմամբ պակասում է Խորենացու հայոց նահապետերի ցուցակի Հրաչեայից անմիջապէս յետոյ եկող անունը՝ Փառնաւազը, որին եւ Բաբելոնի Նաբուգոդոնոսոր թագաւորը տուել է Բագրատունեաց տոհմի հիմնադիր հրեայ Շամբաթին : Այսպիսով՝ ե՛ւ Խորենացու, ե՛ւ Անանունի մօտ Բաբելոնի Նաբուգոդոնոսոր թագաւորի (մ.թ.ա. 605-562) ժամանակակից հայոց թագաւորը (նահապետը) Փառնաւազն է: Սակայն եթէ Խորենացին խօսում է Փառնաւազի ժամանակակից հրեայ Շամբաթի մասին, որից առաջ եկաւ Բագրատունեաց տոհմը, Անանունը խօսում է Փառնաւազի որդի Բագարատի մասին (հայկեան ծագում), որից առաջ եկաւ Բագրատունեաց տոհմը: Անկասկած է, որ սկզբնաղբիւր Մար Աբասի մօտ Փառնաւազին նշելիս ակնարկ է եղել նաեւ Բագրատունեաց տոհմի ծագման մասին, որից ելնելով էլ Խորենացին իր Հայոց պատմութեան տուեալ հատուածում շարադրել է իրեն յայտնի հրեայ Շամբաթի վերաբերեալ աւանդախառն տեղեկու-

թիւնները, իսկ Անանունը՝ իրեն այլ սկզբնաղբիւրից լայնի
Բագրատունեաց տոհմի ծագման տեղեկութիւնները երկու եղբայր-
ների մասին, որից առաջ եկաւ Բագրատունեաց տոհմը: Սակայն
անբացատրելի է մնում, թէ ինչու՝ Անանունը չի վարուել ինչպէս
Խորենացին՝ Բագրատունեաց տոհմի նահապետին միայն ժամանա-
կակից համարելով Փառնաւազին, այլ ազգակցութիւն է ստեղծել
Բագրատունիների եւ այդ ժամանակ Հայաստանում իշխող տոհմի
միջեւ՝ Բագրատունեաց նահապետ Բագարատին համարելով Փառ-
նաւազի որդի: Այս հարցը բացատրութիւն է ստանում, երբ Բագ-
րատունեաց տոհմը եւ Երուանդունեաց արքայատոհմը ծագած ենք
համարում միեւնույն տարածաշրջանային էթնիկ ազգակից ցեղե-
րից: Եւ դրա համար հիմնաւոր փաստարկներ աղբիւրներում
գտնում ենք:

Մ.թ.ա. 716ին Ասորեստանի Սարգոն Բ. արքան (մ.թ.ա. 722-
705 թթ.) արշաւանք ձեռնարկեց Մանայի թագաւորութեան դէմ²:
Այդ արշաւանքի պատճառը մանայական գահի համար ծաւալուած
այն իրադարձութիւններն էին, որոնք ստիպեցին Սարգոնին՝ տա-
րածաշրջանում հաւասարակշռութեան խախտման պատճառով,
լուրջ քայլերի դիմել: Մանային սահմանակից եւ տուեալ ժամա-
նակաշրջանում նրա մասը կազմող երկու երկրների՝ Ուիշդիշի եւ
Զիկիրտոււի առաջնորդներ Բագդատտին եւ Մետատտին հակուած
էին դէպի Ուրարտու եւ այդ պատճառով կազմակերպում են Ասոր-
եստանին դաշնակից Մանայի թագաւոր Ագայի սպանութիւնը:
Ուիշդիշի տարածքում գտնուող Ուաուշ լեռան վրա սպանելով Ա-
գային՝ նրանք գահ են բարձրացնում նրա եղբորը՝ Ուլլուսունու-
լին: Վերջինս նոյնպէս մեղաակից էր սպանութեանը եւ հակուած
հակասորեստանեան դաշինքին: Այդ պատճառով էլ սպանութեան
աներեւոյթ դերակատարին եւ կազմակերպչին՝ Ուրարտուի Ռուսա
Ա. թագաւորին (մ.թ.ա. 735-714) զիջում է 22 քաղաք: Սարգոնն
անմիջապէս արշաւանքի է ելնում իր խախտուած դիրքը տարա-
ծաշրջանում շտկելու համար: Նա կարողանում է բռնել եւ մոր-
թագերծ անել Բագդատտին՝ նոյն Ուիշդիշի Ուաուշ լեռան վրայ,
իսկ մանայական գահը նա թողնում է Ուլլուսունուլին, քանզի նա
կամաւոր կերպով ենթարկուել էր իրեն: Սակայն հակասորես-
տանեան դաշինքը շարունակում էր գործել, եւ այդ պատճառով
Սարգոն Բ.ը մ.թ.ա. 714ին արշաւում է անհնազանդ երկրների
վրայ եւ հասնելով նոյն Ուիշդիշի Ուաուշ լեռը՝ ճակատամարտ
տալիս Ռուսա Ա.ի զօրքերի հետ: Թաղթելով Ռուսային՝ Սարգոնի
համար ճանապարհը բաց էր, եւ նա՝ ոտնակոխ անելով ամբողջ
Ուրարտուն, հասնում է վերջինիս սահմանային Մուծածիր երկի-

րը, լաղթում նրա թագաւոր Ուրգանային եւ սպանելով ու գերելով անհամար բնակչութիւն՝ միաժամանակ բռնադրաւում է մեծ աւար, որի թւում եւ Ուրարտուի Խալդի աստծու եւ Մուծածիրի Բագմաշտու (Բագբարտու) աստուածուհու, որը Խալդիի կինն էր, կուռքերը: Ռուսա Ա.ը, լսելով Մուծածիրի անկման³ եւ իր աստծոյ՝ Խալդիի գերութեան մասին, ինքնասպան է լինում :

Վերը չիշուած Ուիշդիշ երկրի առաջնորդ Բագդատտիին հիմք ընդունելով՝ Բագբարտունեաց նախարարական տոհմին Գրիգոր Ղափանցեանի կողմից տրուել է մանայական ծագում :

Մեր կարծիքով դա թիւրիմացութիւն է, որ առաջ է եկել ասորեստանեան աղբիւրներում նշուած այն տեղեկութիւնից, որ Ուիշդիշը եղել է Մանայի մի երկրամասը, իսկ Բագդատտիի ժամանակ մտնում էր Ուրարտուին դաշնակից երկրների մէջ:

Հարցի ուսումնասիրութիւնը մեզ բերեց այն համոզման, որ Ուիշդիշ երկիրը իրեն յարող տարածքների հետ միասին մի էթնոգոտի էր հանդիսանում եւ միայն այն հանգամանքը, որ այն Մանայի մաս է կազմել, չի կարող փաստարկ հանդիսանալ Բագդատտիի ծագման հարցը որոշելիս:

Արդեօ՞ք կարելի է Ուիշդիշ երկրի Բագդատտիին կապել Բագբարտունեաց նախարարական տոհմի հետ եւ նրան ընդունել որպէս տոհմի նահապետ եւ անուանադիր: Աղբիւրների ընձեռած հնարաւորութիւնները դրական պատասխան են տալիս այս հարցին:

Մինչ մեր հարցադրման անհրաժեշտ ապացոյցներին անցնելը, կարեւոր ենք համարում անդրադառնալ Ուիշդիշ երկրի տեղադրութեան հարցին, քանի որ այն ելակէտ կը հանդիսանայ Բագբարտունեաց տոհմի ծագման հետ կապուած միջանի էական հանգամանքների լուծմանը:

Ուիշդիշ երկրի տեղադրութեան վերաբերեալ պատմաբանների մօտ երկու տեսակէտ գոյութիւն ունի: Մեծամասնութիւնը գտն. մ է, որ Ուիշդիշը գտնուել է Ուրմիա լճի արեւելեան կողմում, իսկ նրա Ուաուշ լեռը ներկայիս Սոհունդ լեռն է : Է. Գրանտովսկին կարծիք է յայտնել նաեւ, ըստ որի Ուաուշ լեռը հնարաւոր է լինի ո՛չ թէ Սոհենդը, այլ⁶ նրանից հարաւ գտնուող Կարա-կայա լեռը (Մարաղայից հարաւ) :

Ի տարբերութիւն գիտնականների այս խմբի՝ Ուիշդիշ երկրի տեղադրութեան հարցում այլ կարծիքի են Նիկողայոս Ադոնցը եւ Յակոբ Մանանդեանը: Ըստ Ադոնցի, Ուիշդիշ երկիրը գտնուել է Ուրմիա լճի հարաւ-արեւմուտքում՝ Ջաղաթու գետի գետաբերանից մինչեւ այժմեան Ուշնուէ քաղաքը ընկած շրջանում, իսկ հիւ-

սխուժում այն տարածուել է մինչև յետագայի Մեծ Հայքի Պարսկահայք, նահանգի Մարի գաւառը ներառեալ եւ շրջակայ տարածքները : Մանանդեանը ամբողջութեամբ ընդունում է Ադոնցի կողմից Ուիշդիշ երկրի տեղադրութեան վերաբերեալ արտայայտուած տեսակէտը :

Մեր կարծիքով Ադոնցի եւ Մանանդեանի արտայայտած տեսակէտերը առաւել ընդունելի են, քանի որ Ուիշդիշ երկրի տեղադրութիւնը հաւանական է տեսնել Ուրարտուին, Մանային եւ Ասորեստանին առաւել մօտ շրջաններում եւ նաեւ պատմութեան տարբեր ժամանակաշրջաններից մինչև մեր օրերը հասած ուսումնասիրուող տարածաշրջանի այն տեղանուններից ելնելով, Ռրոնք ծագում են հին դարերից եւ շատ դէպքերում գուգահեռներունն իրենց նախնական (նաեւ վերաբերող Ուիշդիշ երկրի եւ յարակից շրջանների տեղանուններին) ձեւերին հետ: Պակաս կարեւոր չէ նաեւ Սարգոն Բ-ին մ.թ.ա. 714ի արշաւանքի երթուղու ուսումնասիրումը, որի քննութիւնը մեզ տրամադրում է խօսել յօգուտ Ադոնցի եւ Մանանդեանի արտայայտած կարծիքի: Ինչպէս եւ Ադոնցն է նկատել, Սարգոն Բ-ը Ուիշդիշից յետոյ անցնում է Սուբի երկրով. ապա յիշատակում է Չարանդա երկիրը: Այս երկու երկրները համապատասխանում են Պարսկահայք նահանգի Թրաբի, Ալլի (Կուռիճան), Տամբէթ, Չարեհաւան, Չարաւանդ եւ Հեր գաւառներին: Առաջին երեքը կազմել են Սուբի երկիրը: Մեր համոզմամբ Տամբէթ անունը ծագում է հենց Սուբիից, իսկ մնացած երեքը նոյն Չարաւանդն է, որ պահպանուել է Չարաւանդ գաւառի անուն մէջ:

Այստեղ կարեւոր ենք համարում անդրադառնալ Սուբի անւանը, քանի որ այն կարեւոր նշանակութիւն ունի հարցի ուսումնասիրութեան համար: Նախ պէտք է նշել, որ Սարգոն Բ-ը իր յայտնի արշաւանքը սկսելիս, անցնելով Վերին եւ Ներքին Չարգետերը, Սումբի անուամբ մարզում գորահանդէս է կազմակերպում: Տուեալ Սումբիի վայրի ընտրութիւնը իրենից դժուարութիւն չի ներակայացնում, քանի որ Սարգոնի արձանագրութիւնը մեզ յստակ պատկերացում է տալիս նրա գտնուելու վայրի մասին, այն է Կուլլար լեռան շրջանում, որի անունը նոյնութեամբ պահպանուել է մինչև մեր օրերը: Ըստ Ադոնցի, վերոյիշեալ Սուբի եւ Սումբի անունները նոյնն են եւ, ինչպէս շատ դիպուկ ձեւով նկատում է նա, Սուբին կապում է յոյն աշխարհագրագէտ եւ պատմաբան Ստրաբոնի յիշատակած Συμβάκη շրջանի հետ, որը հռոմէական եռապետ Մարկոս Անտոնիոսը մ.թ.ա. 33ին գիջեց Ատրպատականի Թագաւորին, քանզի այն խլուել էր հայերի կողմից

մեղացիներին²⁰ : Եթէ Սուբիի անունը պահպանուել էր Συμβάκη անուան մէջ, ապա Սուբիի անունը պահպանուել է մ.թ. Բ. դարի յոյն-եգիպտացի հեղինակ Պտղոմէոսի²¹ Աշխարհագրութիւնից յայտնի Σαμβαται έθνοσθի անուան մէջ , որի տարածքը գտնուել է Հայաստանի ծայր հարաւում եւ Սուբէն Երեմեանի կազմած մ.թ. Դ. դարի Մեծ Հայքի քարտէզում նշուած է յետագայի Մահկերտ-տուն գաւառում, որը Կուլլարից գտնուած է ոչ շատ հեռու եւ ամենայն հաւանականութեամբ Սարգոնի ժամանակ մի ընդհանրութիւն է կազմել: Մեր խորին համոզմամբ՝ Սուբիի (Սուբրակէ) անունը պահպանուել է Տամբէթ (Տամբէր) գաւառի անուան մէջ²² եւ ընդհանուր առմամբ այն, ինչպէս նաեւ Սուբիի (ազգն Սամբատալ) անունը ծագում են տոհմական Սմբատ անունից:

Սուբիի եւ Սուբիի երկրների հեռաւորութիւնը նոյնպէս նշանակութիւն չունի, քանի որ նրանց միջեւ ընկած է այնպիսի մի երկրամաս, որը ուղղակի ձեւով նոյնպէս կապուած է Բագրատունեաց նախարարական տոհմի հետ: Դա Ուիշդիշ երկիրն է, Ուրը, ինչպէս ասուեց, տարածուած էր Ուրմիա լճի հարաւ-արեւմուտքում՝ մինչեւ յայտնի Զարասպ լեռը ընկած տարածքներում, եւ որը, ինչպէս այժմ ցոյց կը տրուի, հանդիսանում էր հենց նոյն Բակտրիա երկիրը, որտեղից ծագում են եւ Երուանդունիները: Ուիշդիշ երկիրը, ինչպէս ցոյց է տուել Յովհաննէս Կարազեոզեանը , իր անուամբ համապատասխանում է Բագրատան անուանը: Դա բացատրուած է նրանով, որ Ուիշդիշը, որը ասորեստանեան սկզբնաղբիւրներով վկայուած գրեյաձեւն է, ուրարտական աղբիւրներում միշտ հանդիպում է Ուգիշտի ձեւով, որը ոչ այլ ինչ է, եթէ ոչ Բագրատան անունը (Ուիշդիշ-Ուգիշտի-Վուգիստան-Բագրատան): Բագրատան, եւ որ աւելի ճիշդ է, Բագաստան անունը կազմուած է իրանական «baga» -- աստուած արմատից եւ նշանակում է աստուծոյ երկիր: Նոյն այս բացատրութիւնն է ստանում նաեւ Բակտրիա (Բակտրա) անուանումը, ընդ որում՝ երբ հաշուի ենք առնում այն հանգամանքը, որ Զենդ-Աւեստայում Բակտրիա երկիրը հանդիպում է նաեւ Բագդի անուամբ : Համոզուած կարելի է նշել նաեւ յոյն պատմահայր Հերոդոտոսի այն տեղեկութիւնը, ըստ որի «Պակտիւիկէից, արմէններից եւ հարեւաններից մինչեւ Եւքսինեանը ստացուած էր չորս հարիւր տաղանդ. սա տասներեքերորդ նահանգն էր» : Տուեալ դէպքում Աքեմենեան պետութեան տասներեքերորդ նահանգի մաս կազմող Պակտիւիկէն (Πακτωϊκη) նոյն Բակտրիա (Բագաստան, Ուգիշտի) երկիրն է եւ քանի որ մ.թ.ա. Ե. դարում՝ Հերոդոտոսի ժամանակ, Հայաստանում իշխա-

նութիւնը գտնուում էր Երուանդունիների ձեռքին, որոնք, ինչպէս տեսանք, ծագում են Բակտրիա (Պակտիւիկէ) երկրից, ապա այժմ առաւել համոզիչ է թւում, թէ ինչու Պակտիւիկէն եւ արմէնների երկիրը մէկ նահանգ էին կազմում:

Վերը նշուած փաստերը առաւել համոզիչ են դառնում, երբ մենք ուշադրութիւն ենք դարձնում նաեւ այն հանգամանքին, որ Բագրատունիների տոհմանուան «baga» արմատը տուեալ տարածաշրջանում հանդիպում է ոչ մէկ անգամ եւ, ինչպէս տուեալ հանգամանքը հաշուի առնելով կարելի է ենթադրել, իր նշանակութեամբ ըստականին մեծ դեր է ունեցել իր տարածման ամբողջ արեալում :

Մ.թ.ա. 716 եւ 715ի տակ ասորեպոստանեան աղբիւրներից մեզ յայտնի է Բիթ-Բագայ ամրոցի մասին : Այն, մեր կարծիքով, նույնանում է մ.թ. 2. դարի ասորիքի մատենագիր Մշիխա Զեխայի լիշատակած Բէյթ-Բագաշի հետ : Ճիշդ է, Մշիխա Զեխան Բէյթ-Բագաշի մասին խօսում է որպէս Ադիաբէնի միտրոպոլիտեան թեմերից մէկի մասին, սակայն կարծում ենք, որ այդ թեմի անունը կարող էր ծագել միայն համանուն երկրամասի կամ ընակավայրի անունից, որն էլ հենց ասորեստանեան աղբիւրների լիշատակած Բիթ-Բագայը կարող է լինել:

Ադոնցը Բէյթ-Բագաշը տեղադրում է Մեծ Զաւ²⁹ գետի վրայ՝ Զեռանի եւ Դիգայի սահմաններում, Գեւեռ գաւառակի տեղում : Երեմեանի կազմած Մեծ Հայքի թագաւորութեան մ.թ. 7. դարի քարտէզում Բէյթ-Բագաշը նշուած է Նոր-Շիրական բղեշխութեան Մահկերտ-տուն գաւառում³¹ այժմեան Ռեւանդուզ քաղաքից քիչ հիւսիս ընկած տարածքում : Պարզ է դառնում, որ ըստ ուսումնասիրողների Բէյթ-Բագաշը (Բիթ-Բագայ) գտնուել է անցեալի Մուծածիւր երկրի տարածքում, քանի որ Մուծածիւրը ուսումնասիրողները տեղադրում են Մեծ Զաւ գետի ձախակողմեան շրջանում՝ ներկայիս Ռեւանդուզի, Զիւրարի եւ Սիդեկանի շրջակայ տարածքներում :

Ուշադրութեան են արժանի նաեւ ասորեստանեան աղբիւրներից մեզ հասած Բագ-Թեշուր լրտեսի մասին տեղեկութիւնները : Վերջինս գործել է ասորեստանեան-ուրարտական սահմանային գօտում եւ անկասկած արտայայտում է այն իրողութիւնը, որ «baga» արմատը, ինչպէս Բագդատտի անուան մէջ, իր կիրառութիւնն էր ստացել նաեւ անձնանուններում: Այդ են վկայում նաեւ մ.թ.ա. 714ի տակ՝ Սարգոն Բ.ի կառավարման ժամանակաշրջանից մեզ հասած Զակրուտի³ քաղաքի կառավարիչ Բագպարնայի մասին տեղեկութիւնները : Վերջինս, ճիշդ է, քիչ դուրս է մնում մեր

կողմից ուսումնասիրուող տարածաշրջանից, սակայն վկայութիւնն է այն փաստի, որ «baga» արմատը, յանձինս իր կրողների, արդէն մ.թ.ա. Ը դարում դուրս էր եկել իր տեղական նշանակութիւնից եւ հաստատուն քայլերով տարածուած էր շրջակայ երկրներում:

Վերջապէս պէտք է նշել Մուծածիբի (Արդինի) Բագբարտու (Բագմաշտու) աստուածուհուն, որը ուրարտական գլխաւոր աստուած Խալդիի կինն էր եւ, ըստ ուսումնասիրողների, հոփանաւորում էր պտղաբերութիւնը, արհեստներն ու արուեստները: Այս աստուածուհու հետ է կապուած Մուծածիբ երկրի ամբողջ փառքը, որը իր վախճանը գտաւ Սարգոն Բ-ի՝ մ.թ.ա. 714-ի յայտնի արշաւանքից յետոյ: Ինչպէս տեսանք, Սարգոնը կոնկրէտ Ուրարտուի դէմ իր ռազմական գործողութիւններն սկսեց Ուիշդիշից (Բագաստան)՝ Ուաուշ լեռան մօտ Ռուսա Ա-ի եւ դաշնակից զօրքերի դէմ տուած ճակատամարտով: Հետաքրքիր է, որ արշաւանքը նա աւարտեց Մուծածիբում, որը, ինչպէս կը տեսնենք, հանդիսանում էր այն կոմպակտ տարածաշրջանի (Բակտրիա-Բագաստան) մի մասը, որտեղից սկսել էր նա իր արշաւանքը: Եւ պէտք է ասել, որ ամէնամեծ աւերածութիւնը նա գործեց Մուծածիբում՝ աւարի առնելով եւ հողին հաւասարեցնելով Մուծածիբ քաղաքը, նրա Խալդի աստծոյ տաճարը, գերութեան մասնելով Խալդի աստծոյ եւ Բագբարտու (Բագմաշտու) աստուածուհու արձանները: Ռուսա Ա-ը հենց Մուծածիբի անկման պատճառով ինքնասպանութեան դիմեց: Հարցի ուսումնասիրութեան համար, Մուծածիբ երկրի նշանակութիւնը նաեւ այն է որ նրա Մուծածիբ քաղաքը հանդիշ սանում էր ուրարտական թագաւորների թագադրման վայրը, որն անմիջական ուղղակի կապի մէջ է գտնուում Բագրատունեաց նախարարական տոհմին ենթակայ թագադիր-թագակալ պաշտօնի հետ եւ ցոյց է տալիս այդ տոհմի նշանակութիւնը հենց վաղ հայկական պետութեան պատմութեան համար:

Այստեղ, բացի Երուանդունիների բակտրիական ծագման վերաբերեալ տեղեկութեան, կարեւոր ենք համարում անդրադառնալ նաեւ Պլինիոս Աւագի լիչատակած Արոանդէս ցեղի վերաբերեալ փաստին, որը, ինչպէս նշուել է բոլոր ուսումնասիրողների կողմից, ուղղակի կապուած է Երուանդունեաց տոհմին: Պլինիոսի վկայութեամբ Aroandes (Մանանդեանի մօտ գրուած է Orontes) ցեղը բնակուած էր Գաւգամելա քաղաքից արեւելք: Ուսումնասիրողների կողմից այս ցեղի բնակութեան վայրի հարցում տարակարծութիւն գրեթէ չկայ: Հենրի Ռաուլինսոնի կարծիքով Օրոնտների անունը պահպանուած է այժմէան Ռեւանդուզ տեղանունն մէջ (Օրոնտ→ Երուենտ→ Ռեուենտ): Ռաուլինսոնի առաջ քաշած տեսակէտը

յետագայում ընդունել են գրեթէ բոլորը: էլլիթիկեանը Aroandes-
նեղի ցեղի բնակութեան շրջանը համարում է Արդինի-Մուծածի-
րը, որը ընդհանուր առմամբ համընկնում է Ռաուլինսոնի տե-
սակէտին:

Ինչպէս տեսանք, բոլոր փաստերը վկայում են Երուանդունեաց
եւ Բագրատունեաց տոհմերի նոյն տարածաշրջանային ծագման
մասին: Բացի յատուկ անունների էթնիկ պատկանելիութեան նոյ-
նութիւնից, այս երկու տոհմերի ազգակից լինելու հանգամանքը
ապացուցւում է նաեւ հայոց մատենագիրների տեղեկութիւններով,
որոնք՝ լինելով իրականութեան, աւանդույթի եւ առասպելի սահ-
մանագծին, առանձին դէպքերում պահպանել են պատմական փաս-
տերի առողջ հատիկներ: Դա երեւում է եւ Անանունի արդէն մէջ-
բերուած հատուածից ու նաեւ Խորենացու, Թովմա Արծրունու եւ
այլ մատենագիրների տեղեկութիւններից: Այս կարգի տեղեկու-
թիւնների մէջ իրենց ուրոյն տեղն են զբաղեցնում նաեւ Հայաս-
տան այցելած մ.թ.ա. Ե.-Դ. դարերի լոյն հեղինակ Քսենոփոնի
Կիւրոպեդիայում պահպանուած՝ մ.թ.ա. 2. դարի երկրորդ կէսին
վերաբերող տեղեկութիւնները, որոնցից մէկը կապուած է տուեալ
ժամանակաշրջանում Հայաստանում իշխող արքայատոհմին: Այդ
արքայատոհմից մեզ հասած երկու անձնանուններն էլ՝ Տիգրանը
եւ իր եղբայր Սաբարիսը անմիջականօրէն կապուած են հայոց
մատենագիրների լիշատակած Տիգրան Երուանդեանին (Խորենա-
ցի, եւլն.) եւ Փառնաւազի հայր Շաւարշին (Սեբէոսին կից Անա-
նուն): Ընդ որում՝ վերջին դէպքում Սաբարիսը (Շաւարշ) հաւա-
նաբար հանդիսանում է Փառնաւազի ազգականը (ամենայն հաւա-
նականութեամբ՝ եղբորորդին), քանզի Փառնաւազը գործել է Բա-
բելոնի Նարուզդոնոսոր Բ. թագաւորի ժամանակաշրջանում: Հա-
յոց մէջ (եւ ոչ միայն) ընդունուած աւանդույթի համաձայն՝ տուեալ
դէպքում Տիգրանի եղբայր Շաւարշը իր անունը ստացել է իր
պապի անունից: Բացի արքայատոհմի երկու անձանց անունից՝
Քսենոփոնը մեզ է աւանդում եւս մէկ անուն: Դա հայոց քանակի
հետեւագործի հրամանատար Էմբասի ('Εμβασι) անունն է: Հայոց
պատմագիտութեան մէջ Էմբասին անդրադարձած միքանի ու-
սումնասիրողներից միայն Գրիգոր Խլքլաթեանցն է նկատել, որ
այդ անունը նման է Սմբատ անունին: Մեր կարծիքով, այդ ան-
ւան առաջին տառի վերափոխման պատճառը գրիչների անփու-
թութիւնն է: Գրիչները շատ հեշտութեամբ կարող էին Σ եւ Ε
տառերը նմանութեան պատճառով շփոթել: Համոզուած կարելի է
պնդել, որ Խորենացու լիշատակած Բագրատունեաց տոհմի հիմ-
նադիր հրեալ Շամբաթը իր հիմքում պարունակում է այս հետե-

ւազօրի հրամանատար Սմբատին (Էմբաս) եւ, որ բնորոշ է խորե-
նացու աղբիւրներից օգտուելու մեթոդին, տոհմին հրէական ծագ-
ման փաստը զուտ ժողովրդական եւ տոհմական աւանդութեան
արդիւնք պէտք է համարել:

Այսպիսով, Քսենոփոնի լիշատակած բոլոր երեք անձերն էլ
կապուած են Երուանդունեաց-Բագրատունեաց տոհմերին, որը եւս
ապացուցում է, որ մ.թ.ա. Ը. դարում Հայկական Լեռնաշխարհի
հարաւում սկիզբ առած այս երկու ազգակից տոհմերն արդէն
մ.թ.ա. 2. դարում ամբողջութեամբ իրենց ձեռքում էին կենտրո-
նացրել քաղաքական եւ ուղղափառ իշխանութիւնը: Եւ բոլոր
հիմքերը կան պնդելու, որ այս ազգակից երկու տոհմերի համա-
տեղ զինակցութիւնը հայ ժողովրդի կեանքում շարունակուեց բա-
ւական երկար ժամանակահատուածում եւ իր նշանակութեամբ ու-
նեցաւ նաեւ այն դերը, որ հիմք հանդիսացաւ Հայաստանի՝ որպէս
դասական ազնուականական երկրի ձեւաւորմանը: Այդ համատեղ
զինակցութեան լուսազոյն վկայութիւնն է Արտաշէս Ա.ի (մ.թ.ա.
189-161) Զանգեզուրի արամէերէն արձանագրութիւնը, որտեղ աս-
ւած է. «Արտաշէս թագաւոր, Երուանդունի, Բարեպաշտ, որդի Զա-
րեհի եւ Նեկիար, թագադիր, որդի Ախշահրսաղտի» ([']rthš[sy]
mlk 'rwnd [qn (?)] ʔb br zryhr wnoqr qtr br 'hštrst) : Կարելոր է
համարում այստեղ միայն մէկ ճշգրտում կատարել: Եթէ Արտաշէս
արքան եւ իր հայր Զարեհը արձանագրութիւնում ներկայանում
են իրենց բուն անձնանուններով, ապա նոյնը չի կարելի ասել եր-
կու Բագրատունի իշխանների մասին: Այստեղ երկու Բագրատու-
նիներն էլ կրում են ոչ թէ իրենց բուն անձնանունները, ինչպէս
սխալմամբ գտնում են ուսումնասիրողները, այլ նրանք ներկայաց-
ւած են միմիայն մակդիրներով, որի պատճառը վերջիններիս հո-
գեւոր գործունէութեան (քրմութեան եւ թագադրութեան պաշ-
տօններից ելնելով) մէջ է: Նեկիարը, ինչպէս Անահիտ Փերիխան-
եանն է նշում , իր բացատրութիւնն է ստանում որպէս «օժտուած
ազնուափայլ մեծութեամբ», իսկ Ախշահրսարտ մակդիրը, մեր
կարծիքով, ծագում է իրանական xšaθra (աշխարհ) եւ srθta⁴⁷
(հռչակաւոր) բառերից:

Արձանագրութեան կարեւորութիւնն այն է, որ այստեղ տրը-
ւում է Արտաշէսի հօր անունը: Զարեհ անունը (Zariā⁴⁸ - ոսկեզոյն
կրակով օժտուած) եւ ընդհանրապէս դար (ոսկի) արմատը այս եր-
կու ազգակից տոհմերի համար ունեցել են բացառիկ նշանակու-
թիւն: Զարեհ անունն է կրում Անանունի բերած հայոց արքայա-
տոհմի, որն, անկասկած, Երուանդունեաց արքայատոհմն է, առա-
ջին արքայիկը (կառավարման սկիզբը ըստ Անանունի՝ մ.թ.ա.

680): Այդ անունն են կրում Արտաշէս Ա.ի հայրը եւ որդին, Մոփքի Երուանդունի թագաւորը, Տիգրան Բ. Մեծի (մ.թ.ա. 95-55) որդին: Ջար արմատով են կազմուած երկու տոհմերի հետ անմիջական աւրնչութիւն ունեցող այնպիսի տեղանուններ, ինչպիսիք են Ջարեւանդը, Ջարեհաւանը, Ջարիշատը: Ընդ որում, ասորեստանեան աղբիւրների Ջարանդան (Ջարեւանդի եւ Ջարեհաւանի տարածքում), Խորենացու իսկ վկայութեամբ, անմիջականօրէն կապուած է մեր կողմից արդէն մատնանշուած Բակտրիա (Բագաստան) երկրի հետ եւ ցոյց է տալիս Երուանդունիների եւ Բագրատունիների՝ դէպի հայոց միջնաշխարհ տարածուելու երթուղին: Եվ վերջապէս պէտք է նշել Ջարասպ լեռը, որը, համոզուած ենք, նոյն Ուաուշ լեռն է: Այս Ուաուշ լեռան շուրջը լորն է տարածուած Բակտրիա (Բագաստան) երկիրը, որն առանձին ժամանակահատուածներում, կապուած քաղաքական տեղաշարժերի հետ, բաժանուել է միջանի մասերի (Բագաստան-Ուզիշտի, Սուժրի, Սուրի, Մուծածիր), մէկ ամբողջութեամբ մաս է կազմել Ուրարտուին, կամ եղել է բաժանուած Ուրարտուի եւ Մանայի միջեւ, կամ էլ թիրախ է դարձել Ասորեստանի արքաների արշաւանքների: Ուաուշի (Ջարասպ) եւ Բակտրիայի (Բագաստան) անմիջական կապը երեւում է նաեւ Միջին Ասիայի Բակտրիայից, որը, ինչպէս նշուել է արդէն, կրում է նաեւ Ջարիասպա անունը: Ըստ երեւոյթին, Ջարասպ (Ուաուշ) լեռը շրջակայ ցեղերի, յատկապէս՝ Երուանդունեաց եւ Բագրատունեաց տոհմերի եւ ընդհանրապէս Բագաստան երկրի համար հանդիսացել է սուրբ լեռ: Այդ են վկայում տուեալ լեռան վրայ տեղի ունեցած մաննայական Ագա թագաւորի սպանութիւնը Բագրատուի կողմից: Այս Բագրատուի սպանութիւնը Սարգոն Բ.ի կողմից նոյն լեռան վրայ: Նոյն լեռան վրայ տեղի ունեցած ճակատամարտը Սարգոն Բ.ի բանակի եւ Ռուսա Ա.ի ու դաշնակից զօրքերի միջեւ, որտեղ ուրարտական կոալիցիան մեծ պարտութիւն կրեց: Մեր կարծիքով, ասորեստանեան աղբիւրների այն տեղեկութիւնը, որ երբ Սարգոն Բ.ի զօրքը մտաւ Մուծածիր, վերջինիս թագաւոր Ուրգանան փախաւ եւ բարձրացաւ իր լեռը, նոյնպէս վերաբերում է Ջարասպին: Եւ այս ամէնը ընդամէնը կատարուեց երեք տարուալ ընթացքում՝ մ.թ.ա. 716-714ին:

Այս երկու տոհմերի՝ դէպի Հայաստանի միջնաշխարհը տարածուելու երթուղին նոյնպէս բաւականին յաջող ձեւով վերականգնում է: Անանունի վկայած առաջին Երուանդունի թագաւորի (արքայիկ)՝ Ջարեհի կառավարման շրջանում (սկսած մ.թ.ա. 680ին), երկու ազգակից տոհմերի կենսոլորտն էր դարձել արդէն նշուած Ջարանդա երկիրը: Նրան յաջորդած Արմոգ եւ Սարհանգ

արքայիկներին յետո՛յ Շաւարշի կառավարման շրջանում, երկու տոհմերը իրենց ազդեցութեանն են ենթարկել Վասպուրականի Արտազ գաւառի տեղում ընկած տարածքները, որի ապացոյցն է Արտազի Շաւարշան քաղաքի՝ Քաղէոս առաքեալի քարոզչութեան յայտնի կենտրոնի անուանումը : Շաւարշի յաջորդած Փառնաւազի կառավարման շրջանում (մ.թ.ա. 590-580ականներ) երկու տոհմերն իրենց են ենթարկել Մասիս լեռան շուրջ ընկած տարածքները (Փառականի դաշտ, Փառախոտ), ինչպէս նաեւ Նախճաւանի շրջանում անցնելով Արաքս գետը՝ հասել են մինչեւ պատմական Գողթն⁵⁴ գաւառ (Փառական բերդ) : Փառնաւազին յաջորդած Երւանդի կառավարման շրջանում այս տոհմերը իրենց ազդեցութիւնն են տարածել ուրարտական պետութեան կենտրոնական շրջանների վրայ (Երուանդական (Վան) քաղաքը, Երուանդունիք գաւառ) եւ հաւանաբար այս Երուանդ արքայի ձեռքով է վերջնականապէս պատմութեան թատերաբեմից դուրս եկել ուրարտական թագաւորութիւնը, եւ Երուանդը՝ ձեռք բերելով լիարժէք ինքնիշխանութիւն, հիմք է դրել իր անուամբ արքայատոհմին : Երուանդին յաջորդած Տիգրանի կառավարման շրջանը (մ.թ.ա. 550-530ականներ) պէտք է համարել Հայաստանի փառքի եւ հզօրութեան ժամանակաշրջան, քանզի Տիգրանի եւ Աքեմենեան Պարսկաստանի հիմնադիր Կիւրոս Մեծի (մ.թ.ա. 550-530) զինակցութիւնը բերեց երկու պետութիւնների Առաջաւոր Ասիայում գերիշխանութեան հաստատմանը : Մեր կարծիքով, Խորենացու այն վկայութիւնը, որ Տիգրացն Երուանդեանը իր անունով կառուցեց Տիգրանակերտ քաղաքը , նոյնպէս չի հակասում իրականութեանը եւ չպէտք է շփոթել Տիգրան Մեծի կառուցած Տիգրանակերտ մայրաքաղաքի հետ : Տիգրան Երուանդեանի Տիգրանակերտը, հնարաւոր է, նոյնանում է Դպրե՛հ Ա.ի Բեհիսթունեան արձանագրութեան Տիգրա վայրի հետ , որտեղ ճակատամարտ տեղի ունեցաւ ապստամբած հայոց եւ պարսից բանակների միջեւ : Միաժամանակ հնարաւոր ենք համարում նոյնացնել վերը նշուած երկու բանակավայրերը (Խորենացու Տիգրանակերտն ու Դարե՛հ Ա.ի Բեհիսթունեան արձանագրութեան Տիգրան) Պողոմէոսի յիշատակած Tigranoama (Tigranuana) բանակավայրին հետ, որը գտնուում էր Արտեմիտայից (Վասպուրականի Հայոց Ձոր գաւառում) դէպի հարաւ-արեւելք՝ մինչեւ հայկական Զագրոսի (Կոհ-ի-Նիհորական լեռներ) ու Նպատական լեռների միանալու շրջանը ընկած տարածքներում եւ տեղորոշում է մօտաւորապէս Կորճայքի ճահուկ գաւառի շրջանում : Այսպիսով, հիմք ունենալով այն տեղանունները, որոնք ուղղակի ձեւով եւ անմիջականօրէն կապւում են Եր-

լանդունեաց եւ Բագրատունեաց տոհմերին՝ հնարաւորութիւն է ստեղծուած յստակ որոշել այն երթուղին, որը անցան այս երկու տոհմերը իրենց նախնական պատմութեան ընթացքում:

Միաժամանակ պէտք է նշել այն հանգամանքը, որ Բագատան (Բակտրիա) երկիրը դէպի հիւսիս եւ հիւսիս-արեւմուտք շփման մէջ գտնուելով ամբողջութեամբ հայկական էթնիկ աշխարհի հետ, իսկ դէպի հարաւ եւ հարաւ-արեւելք շփման մէջ գտնուելով ամբողջութեամբ իրանական էթնիկ աշխարհի հետ, կրողն էր երկու էթնիկ խմբերի ազդեցութեան: Հետեւաբար եւ հալ ժողովրդի կեանքում անգնահատելի դեր կատարած նշուած երկու տոհմերը, լինելով իրենց բնօրրանի՝ Բակտրիա-Բագատանեան քաղաքակրթութեան կրողները, որն առանձնանում էր առաջին հերթին ուրոյն կրօնական համակարգով եւ նաեւ ձեւաւորուած տոհմական կարգերի առկայութեամբ, նպաստեցին եւ հող նախապատրաստեցին այն կարգերի ձեւաւորման համար, որոնք կոչւում են նախարարութիւններ: Նախարարութիւնների լաւագոյն մասնագէտի Ադոնցի դիպուկ բնորոշումը, թէ՛ Բագրատունեաց տոհմը «առաջ է եկել հայ-իրանական էթնիկական հողի վրայ» ամբողջութեամբ վերաբերում է նաեւ Երուանդունիներին եւ հանդիսանում է մեր այս աշխատութեան վերջնական արդիւնքը, որին եւ մենք յանգեցինք այս քննութեան ընթացքում:

ԾԱՆՕԹԱԳՐՈՒԹԻՒՆՆԵՐ

¹ Գէորգ Տիրացեան, «Երուանդունիները Հայաստանում», ՀՍՍՀ ԳԱ Տեղեկագիր հասարակական գիտութիւններ, 1958, թիւ 6, էջ 69-70. նոյնի՝ «Անաբասիւր՝ եւ Հայաստանը», տե՛ս՝ Քսենոփոն, *Անաբասիս*, Երևան, 1970, էջ 221-241. Միմոն Կրկեաշարեան, «Երուանդունի արքայատոհմը Հայաստանում», *Պատմա-բանասիրական Հանդէս*, 1973, թիւ 4, էջ 179-186. Ժամենա Էլէիբեկեան, «Երուանդունիների ծագման հարցի շուրջը», *Պատմա-բանասիրական Հանդէս*, 1971, թիւ 2, էջ 107-115. Սուրէն Երեմեան, «Հայկական առաջին պետական կազմաւորումները (VII-VI դդ. մ.թ.ա.)», *Պատմա-բանասիրական Հանդէս*, 1968, թիւ 3, էջ 104-113. Խ. Բաբայեան, *Բագրատունեաց նախարարութիւնը*, Թիֆլիս, 1908, էջ 12-15. Նիկողայոս Ադոնց, *Հայաստանը Եռաստիսիանուի դարաշրջանում*, Երևան, 1987, էջ 433, 458-459. Ա. Շահնազարեան, «Բագրատունեաց նախարարական տոհմի ծագումը», *Հայաստանի պատմութեան պետական թանգարանի աշխատութիւններ*, հ. 1, Երևան, 1948, էջ 167-212. Կիրիլ Թումանով, *Հայաստանի Ռրոնդեանները*, Վիեննա, 1970. Ռաֆայէլ Մաթեոսեան, *Բագրատունիները*, Երևան, 1997, էջ 55-65, եւ.ն.:

² Էլէիբեկեան, էջ 107-108.

- ³ Գրիգոր Ղափանցեան, *Ուրարտուի պատմութիւնը*, Երեւան, 1940, էջ 203, 219, ծան. 1. Աստուհ Մ. Գարագաշեան, *Քենական պատմութիւն Հայոց*, մասն Ա., Թիֆլիս, 1895, էջ 173. Հայկ Մելքոնեան, *Աշխարհնի պատմութիւնը եւ Հայաստանը*, Երեւան, 1980, էջ 129-134. Մաթեոսեան, էջ 8-9, 65 եւ յն. :
- ⁴ Էլէիբեկեան, էջ 108-115:
- ⁵ Մովսէս Խորենացի, *Պատմութիւն Հայոց*, Երեւան, 1991, էջ 23 (գիրք Ա., գլ. 9.)
- ⁶ Նոյն, էջ 26:
- ⁷ Ինչպէս եւ Էլէիբեկեանը, Երեմեանը նոյնպէս շատ մօտ է եղել իրական բացատրութեանը. տե՛ս՝ Երեմեան, էջ 112-113: Նա նոյնպէս գտնում է, որ Երուանդունիների բակտրիական ծագումը առաջ է եկել «Չարասպ» անունանոց նոյնանուն հողի վրայ, եւ որ աբ տոհմը ծագում է նշուած յերան շուրջ ընկած տարածքներից: Բանն այն է, որ նրանք չեն կարողացել ենթադրել Բակտրիա անուամբ մէկ այլ երկրի գոյութեան մասին, որը կարող էր գտնուել Չարասպ յերան շրջանում:
- ⁸ G. Khalatians, *Armiantskii epos* [Հայկական դիւցազնավէպ], Ա. մաս, Մոսկուա, 1896, էջ 162-163. Կարապետ Բասմաջեան, *Իսկական պատմութիւն Հայոց*, Կ. Պոլիս, 1914, էջ 88-89. Լէօ, «Հայոց պատմութիւն», *Երկերի ժողովածու 10 հատորով*, հ. 2, Երեւան, 1967, էջ 490-491. Նիկողայոս Աղոնց, «Բագրատունեաց փառքը», *Պատմական ուսումնասիրութիւններ*, Փարիզ, 1948, էջ 109:
- ⁹ *Պատմութիւն Սեբեասի*, աշխատասիրութեամբ Գ. Վ. Արզարեանի, Երեւան, 1979, էջ 51 (գլ. Ա.)
- ¹⁰ Մանուկ Աբեղեան, «Հայ ժողովրդական առասպելները Մ. Խորենացու Հայոց պատմութեան մէջ», *Երկեր*, հ. Ը., Երեւան, 1985, էջ 200-207:
- ¹¹ Խորենացու Ա. գրքի իւր գլուխը ձեռագրերում մեզ է ներկայանում նախադասութիւնների տարբեր դասաւորութեամբ: Մեզ հետաքրքրող հատուածը գրուած է հետեւեալ կերպ. «Յիշեցուք զանուանս զայստսիկ: Հրաչեայ. սա կոչի վանն առաւել պայծառերես եւ բոցակնազոյն իմն լինելոյ: Առ սովաւ ասն կեցեալ...», որը պէտք է սրբագրուի հետեւեալ կերպ. «Յիշեցուք զանուանս զայստսիկ: Հրաչեայ. սա կոչի վանն առաւել պայծառերես եւ բոցակնազոյն իմն լինելոյ» Փառնաւազ. առ սովաւ ասն կեցեալ ...», Աբեղեան, էջ 204-205:
- ¹² Այն հանդիպում է նաեւ Մաննա ձեւով: Ճիշդը Մանա ձեւն է:
- ¹³ Igor M. Diakonov, «Assiro-vavilonские istochniki po istorii Urartu» [Ասորա-բաբելոնական սկզբնաղբիւրները Ուրարտուի պատմութեան մասին], *Vestnik Drevnei Istorii*, 1951, No. 3, էջ 209-210. տես նաեւ Նիկողայոս Աղոնց, *Հայաստանի պատմութիւն*, Երեւան, 1972, էջ 101-102:
- ¹⁴ Ղափանցեան, էջ 203, 219, ծան. 1:
- ¹⁵ Boris B. Piotrovskii, *Istoriia i kultura Urartu* [Ուրարտուի պատմութիւնն ու մշակութիւնը], Երեւան, 1944, էջ 103-128. I. M. Diakonov, *Istoriia Midii* [Մարաստանի պատմութիւնը], *Մոսկուա-Լենինկրատ*, 1956, էջ 216. N. V. Arutunian, *Toponomiki Urartu* [Ուրարտուի տեղանունները], Երեւան, 1985, էջ 197, եւ յն.: Գրականութեան մէջ Սոհունդ յերան անուան հանդիպում ենք նաեւ Սոհնդ ձեւով:
- ¹⁶ E. A. Grantovskii, *Ranniaia istoriia iranskikh plemen Perednei Azii* [Առաջաւոր Ասիայի իրանական ցեղերի վաղ պատմութիւնը], *Մոսկուա*, 1970, էջ 274:

- ¹⁷ Աղոնց, Հայաստանի պատմութիւն, էջ 108-109.
- ¹⁸ Յակոբ Մանանդեան, "Marshruti pokhodov Salmanasara III i Sargona II protiv Urartu (v 857 i 713 gg. do n.e.)" [Ուրարտուի դէմ Սալմանասար Գ-ի եւ Սարգոն Բ-ի արշաւանքների երթուղիները (մ.թ.ա. 857 եւ 713 թթ.)], Երկիր, հ. Ե., Երեւան, 1984, էջ 469-471.
- ¹⁹ Աղոնց, Հայաստանի պատմութիւն, էջ 110, ծան. 1.
- ²⁰ Strab. XI, էջ II.
- ²¹ Ptol., VI, էջ 1, 2.
- ²² Մեր կարծիքով նշուած անունների գլխաւոր տարբերիչ Ս եւ Տ հնչիւնների ընդդէմը հետեւանք է հին պարսկերէնում օրինաչափութիւն համարուող S > Տ անցման Այս մասին տե՛ս E. A. Grantovskii, "O rasprostraneniі iranskikh plemen na territorii Irana" [Իրանի տարածքում իրանական ցեղերի տարածման մասին], *Istoriia Iranskogo gosudarstva i kulturi* [Իրանական պետութեան ու մշակութի պատմութիւն], Մոսկուա, 1971, էջ 309-310.
- ²³ Թովհանէս Կարապետեան, Հայկական լեռնաշխարհը սեպագիր աղբիւրներում, հ. 1, գիրք 1, Սեպագիր տեղանուններ, Երեւան, 1998, էջ 307.
- ²⁴ *Drevnie avtori o Srednei Azii (VI v. do n.e.-III v. n.e.)* [Հին հեղինակները Միջին Ասիայի մասին (մ.թ.ա. 7- դար-մ.թ. 9- դար)], Քրեատոմատիա խմբագրութեամբ Լ. Վ. Բաթենովի, Տաշկենդ, 1940, էջ 18.
- ²⁵ Հերոդոտոս, Պատմութիւն ինը գրքից, Թարգմ. Սիմոն Կրկեաշարեանի, Երեւան, 1986, էջ 197 (Գիրք երրորդ, 3).
- ²⁶ Հին պարսկական «bagasն ունեցել է ընդհանուր «աստուած» նշանակութիւնը։ Այդ նոյն «bagasն, սակայն, հին հնդկական միջավայրում հանդիսանում էր կամ առանձին աստծոյ յատուկ անուն, կամ մի շարք աստուածների տրուող մականուն։ Աւետարում «bagasն Միթրա (Միհր) աստծուն տրուող մականուն է (տե՛ս Grantovskii, *Ranniaia*, էջ 156).
- ²⁷ Grantovskii, *Ranniaia*, էջ 313.
- ²⁸ Ասորական աղբիւրներ, Ա., Թարգմանութիւն բնագրից, առաջաբան եւ ծանօթագրութիւններ Հ. Մելքոնեանի, Օտար աղբիւրները Հայաստանի եւ հայերի մասին, 8, Երեւան, 1976, էջ 107.
- ²⁹ Այն հանդիպում է նաեւ Մեծ Չար ձեւով։
- ³⁰ Աղոնց, Հայաստանը Յուստինիանոսի դարաշրջանում, էջ 258.
- ³¹ Մեծ Հայքի Թագաւորութիւնը մ.թ. IV դարում, քարտէզի հեղինակ՝ Ս. Տ. Երեմեան, Երեւան, 1979.
- ³² N. V. Arutunian, էջ 145 եւ 234-235.
- ³³ Grantovskii, *Ranniaia*, էջ 306.
- ³⁴ Նոյն, էջ 324.
- ³⁵ Մաթեւոսեան, էջ 7.
- ³⁶ I. M. Diakonov, *Presdistoriia armianskogo naroda* [Հայ ժողովրդի նախապատմութիւնը], Երեւան, 1968, էջ 140.
- ³⁷ Plin., *Nat. Hist.* VII, 1, էջ 18.

- ³⁸ Մանանդեան, «Պատմա-աշխարհագրական մանր հետազոտութիւններ», Երկեր, հ. Ե., Երևան, էջ 308-309:
- ³⁹ Rawlinson, Journal of Royal Geographical Society, 1838, էջ 73:
- ⁴⁰ Էլէիթեկեան, էջ 114:
- ⁴¹ Քանտոփոն, *Կլարոպեդիա*, V, 3, էջ 38:
- ⁴² G. Khalatiant, *Ocherki istorii Armenii v sviazi s obshchim khodm sobitii v Perednei Azii* [Հայաստանի պատմութեան ուրուագիծ, Առաջաւոր Ասիայում դէպքերի ընդհանուր ընթացքին առնթեր], Մոսկուա, 1910, էջ 79:
- ⁴³ Ինչ վերաբերում է էմբաս անուան վերջաւորութեանը, ապա պէտք է ասել, որ Մօրիկ կասեր յոյն կենսագիր, պատմիչ Սիմոկատուէսի մօտ հայոց Ամբաս Բագրատունի իշխանի անունը գրուած է Symbace (տես Պատմութիւն Սեբեոսի, Երևան, 1979, էջ 256, ծան. 262), որը ապացուցում է, որ ի տարբերութիւն Ամբասիոս կամ Սուքրատէս վերափոխման օրինաչափ ձևի՝ Ամբաս անուան վերափոխումը Ամբասի նոյնպէս գործածական է եղել կարծում ենք, որ Կոստանդին Միրանաձի (տե՛ս՝ *Բիւզանդական աղբիւրներ, Բ., Կոստանդին Միրանաձի, Թարգմանութիւն քննադրից, առաջաբան եւ ծանօթագրութիւններ* Հրաչ Բարթիկեանի, Օտար աղբիւրները Հայաստանի եւ հայերի մասին, Ե., Երևան, 1970, էջ 81) լիշատակուած հազարացի Սամբասի անունը նոյնպէս վերը լիշուած վերափոխման օրինաչափութիւնների հետեւանք է:
- ⁴⁴ Խորենացի, *Գիրք Ա.*, գլ. իւր. էջ 68-69:
- ⁴⁵ A. G. Perikhanian, "Arameiskaia nadpis iz Zangezura" [Արամէերէն արձանագրութիւն Չանգեզուրից], *Պատմա-բանասիրական Հանդէս*, 1965, թիւ 4, էջ 108:
- ⁴⁶ *Նոյն*, էջ 110:
- ⁴⁷ Grantovskii, *Ranniaia*, էջ 325:
- ⁴⁸ Perikhanian, էջ 109:
- ⁴⁹ Խորենացի, *Գիրք Ա.*, գլ. Գ., էջ 22-27:
- ⁵⁰ Աղոնցը գտնում է, որ Ուաուշ լեռը ժամանակակից Ուշնուէից տասնհինգ կիլոմետր հեռաւորութեան վրայ գտնուող 2000 մետր բարձրութիւն ունեցող այն լեռն է, որի կողքով է անցնում Դերբենդի լեռնանցքը (Աղոնց, *Հայաստանի պատմութիւն*, էջ 108): Մանանդեանը, վկայակոչելով Հայր Ղեւոնդ Ալիշանի եւ Գ. Հոֆմանի արտայայտած տեսակէտերը, գտնում է, որ Զարասպ լեռը տեղորոշում է Կելիշինի լեռնանցքի շրջանում (Մանանդեան, *Երկեր, հտ. Ե.*, էջ 295-297): Ըստ Երեմեանի, այդ լեռը Կելիշինի լեռնանցքից հարաւ գտնուող այժմեան Սիահկուհ գագաթն է՝ 3497 մետր բարձրութեամբ (Երեմեան, էջ 113):
- ⁵¹ Զարասպ անունն իր բացատրութիւնն է ստանում որպէս «ոսկէ նժուղ» եւ կապում է ձիերի պաշտամունքի հետ: Բագրատունիների կողմից ձիերի պաշտամունքի մէկ այլ վկայութիւնն է նրանց տոհմական ասպետ» տիտղոսի անուանումը, որը քրիստոնէական շրջանում, իհարկէ, կորցրել էր իր նշանակութիւնը: Ուաուշ անունը, ըստ Գրանտովսկու տողաբանութեան, ծագում է իրանական *Vahuš (լաւ, բարի) բառից (Grantovskii, *Ranniaia*, էջ 274), որը նոյնպէս կապում է հեթանոսական պաշտամունքների հետ:
- ⁵² Diakonov, "Assiro-vavilonskie istochniki", էջ 210:

⁵³ Եզնիկ քհնյ. Պետրոսեան, Հայ եկեղեցու պատմութիւն, մասն Ա., էջ 11, 1990, էջ 11.

⁵⁴ Հայոց պատմագրութեան մէջ ապացուցուած է, որ Նորինացու ճարական թագաւորութեան ժամանակաշրջանի հայ իշխողները ցուցակում պատմական են միայն երկուսը՝ Երուանդը եւ նրա որդի Տիգրանը (տես, օրինակ, Երեմեան, էջ 105): Համոզուած կարելի է նշել, որ Երուանդի կառավարման շրջանը հենց լաջորդում է Փառնաւազին:

⁵⁵ Նորինացի, Գիրք Ա., գլ. 1, էջ 83.

⁵⁶ Հայ Ժողովրդի պատմութեան քրեատմատիա, հ. 1, Երեւան, 1981, էջ 155.

⁵⁷ Արոնց, Հայաստանը Յուստինիանոսի դարաշրջանում, էջ 458.

ON THE ISSUE OF THE ORIGIN OF THE YERVANDUNIS AND
THE BAGRATUNIS
(Summary)

SARO SAROYAN

The author delves into the controversial discussion on the origins of two Armenian royal dynasties, the Yervandunis (Orontids) and the Bagratunis (Bagratids). According to the primary sources, there are two apparently contradictory versions on the origins of the Yervandunis. Based on these different sources, some scholars consider the Yervandunis to be natives of Armenia; others, descendants of the Achaemenids or of a close associate of the Achaemenid King, Darius. Still other sources claim that the Yervandunis came from an area called Boriadjik in Pergamum, situated at the south-eastern tip of the Armenian Highland. As far as the Bagratunis are concerned, some sources consider them to be natives of Armenia, while others claim a Jewish origin for them.

The author notes that most researchers have rejected the hypothesis of a Jewish origin for the Bagratunis, for different reasons.

The author then highlights, among several other details, the fact that the word "baga", part of the dynastic name of the Bagratunis, is also found in several inscriptions and, with minor variations, in the names of different localities in the Kingdom of Urartu. After analysing and summing up such details of geographical and historical significance, he concludes that the Yervandunis and the Bagratunis originated in the same location, the southern district of the Armenian Highland. He asserts that by the sixth century B.C., these two dynasties had taken into their hands the political and military mantle of the country and had consolidated themselves into a natural coalition. By lining up the names of several Armenian localities, which are linked to the names of these two dynasties, the author depicts the possible trajectory that these two dynasties followed to reach the Armenian hinterland.

The author reiterates the opinion of Nicholas Adonts that the Bagratunis had originated in the south of the Armenian Highland on an Armenian-Iranian ethnic basis to conclude that the Yervandunis had a very similar origin.